

~~D8~~ ~~Lan, Ting-yuen~~
~~895~~ ~~P'ing T'ai chi lueh~~
~~F75L35~~
~~1796~~

East Asia


PLEASE DO NOT REMOVE
CARDS OR SLIPS FROM THIS POCKET


UNIVERSITY OF TORONTO LIBRARY


DS Lan, Ting, yüan
799 P'ing T'ai chi lüeh
 .65
L357
1796

East Asia









DS

799

.65

L357

1796

龍威秘書二集

第七冊目錄

平臺紀畧

國朝
藍鼎元

音風祕書二集



平聲

漢

韻

欽定四庫全書簡明目錄

國朝藍鼎元撰平臺紀畧紀康熙辛丑平定臺灣逆寇
朱一貴始末起是年四月迄雍正元年四月鼎元時
在其兄總兵官廷珍軍中故見聞最悉

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

序

史以紀事垂法戒夫人而知之矣顧史才難得龍門
扶風而後寥寥數家愈趨愈下宋元之間一望茅葦
沉于稗官野史惡有可觀者哉稗野之文鮮衷乎道
循訛走僻炫異逞奇求悅市井庸俗人之耳目有道
君子弗爲也若有識有筆據事直書卽在一郡一邑
方隅治亂之微皆必以春秋之直道行之雖稗野猶
正史矣平臺紀畧亦野史之流也康熙六十年臺灣
土賊朱一貴作亂

王師平之鹿洲山人身在行間目覩風濤戎馬豕突
鴻哀指揮戡定經歲餘而後返其于全臺形勝事蹟
及軍中叅贊公檄謀謨具載東征一集讀者自能知
之繼因當時市井道聽耳食妄言臺事懼訛傳而失
其真將惑亂他年史氏之聞見此平臺紀畧之書所
由作也其書以垂戒爲主使守土之官兢兢業業顧
畏民岩奸頑之輩革面革心共興仁讓是以起亂必
書長亂必書棄民失地狼狽遁逃必書羣賊得志倡
獗恣無忌憚必書以明封疆任重稍存玩忽之心必

至決裂潰敗不可收拾如此豈不足爲前車之鑒乎
自古作亂逆賊靡不身首橫分史冊昭然愚氓或有
未盡識者卽以目前朱一貴竊踞海邦有地千數百
里有靈全數十萬妄擬王公拜官封爵充盜賊之志
願至此極矣曾不旋踵而或磔或梟妻子親屬並受
誅夷作賊果奚益乎回思守分善良安生樂業何等
愉快所以灰叛亂之心而作其尊君親上之氣又不
啻示之標準焉嘉不屈嘉守澎湖臣節也敘調度敘
戰功敘擒撫予出力也置身局外不以己名雜其內

示公也總論其是非得失疆境關繫施經綸而措之
治安又善後之良策也使人人皆讀此則在上無玩
忽之官在下無悖逆之民千秋百載久安長治山人
之有功世道也豈淺尠哉山人平素以世道人心爲
己任所著女學學準公案諸書皆裨風化不苟作少
時有志欲續明綱目旁求徵信及至

京師見明史館纂述未竣恐不無是非互異之嫌又
明人子孫有向山人嘵嘵聚訟者是以中輟慨然欲
修宋史未敢自信先纂唐代名臣爲修史試筆一書

以質海內今宋史雖未成編而讀斯平臺紀畧亦可
知其史才之大槩矣紀畧成于

雍正元年風行海內者十載舊板漫漶余爲加評點
而新之因併敘其事于簡端

雍正十年歲次壬子秋八月同學弟天長王者輔拜
手題

平定

平定十平定六王平定八民同定大平定平定無平
而像之因平定其平定平定

平定十平定六王平定八民同定大平定平定無平
而像之因平定其平定平定

平定十平定六王平定八民同定大平定平定無平
而像之因平定其平定平定

序

藍子自東寧歸見有市靖臺實錄者喜之甚讀不終
篇而喟然起喟然歎也曰嗟乎此有志著述惜未經
身歷目覩徒得之道路之傳聞者其地其人其時其
事多謬悞且至于此然則史氏之是非其迷于稗官
野史之紀載者不乏矣臺灣雄踞海外直關內地東
南半壁沿海六七省門戶相道其亂其平非于國家
渺無輕重者致亂之由定亂之畧殉難喪節運籌折
衝皆將權衡其袞鉞以爲千秋之龜鑑言焉而不求

其實習焉而不知其訛鄙人所爲懼也謏劣不才學
荒識陋東征逾載躬歷行間風濤戎馬磔鼠哀鴻執
馘獻俘招降殄孽至于采搜窮山綏靖番黎無不目
擊手揮又或中夜聞警磨盾草檄千里驅馳睇瞻要
害廢寢食冒風露蓋亦幾經勞瘁矣無一命之膺當
贊畫之寄事定歸來滿船明月惟有全臺形勝治亂
事蹟了了胸中所見所聞視他人較爲切實則平臺
紀畧之作惡可已也據事直書功無遺漏罪無掩諱
自謂可見天日質鬼神而或者以列憲稱名爲譏是

猶未知載筆之道者載筆所以傳信非一人一時之
文天下後世共之而姓名尚不敢筆之書則過失在
所必諱縱功績可紀亦等之諂語設詞夫豈其可傳
耶鄙人愚昧文不足傳平臺大役事在必傳直道平
心無爲市井訛談所昏惑亦庶乎其可矣若夫鑒前
車綢繆雨施經綸措康乂有治安之責者諒早留心
不待閱茲編而後得之也

雍正元年癸卯夏五月端午日閩漳藍鼎元玉霖氏
自題于鹿草廬

Table with 10 columns and 10 rows of text. The text is extremely faded and illegible.

平臺紀畧

漳浦藍鼎元玉霖著

天長王者輔近顏評

朱一貴之亂

大清康熙六十年辛丑夏四月臺灣奸民朱一貴作亂。一貴漳之長泰人。小名祖游。手無藝。好結納奸宄。爲鄉里所嫉。于康熙五十二年之臺灣充臺廈道轅役。尋被革。居母頂草地。飼鴨爲生。其鴨旦暮編隊出入。愚眈異焉。奸匪過者輒欸延烹鴨具饌。務盡歡。時

承平日久。守土恬熙。絕不以吏治民生爲意。防範疎濶。一貴心易之。辛丑春。鳳山縣令缺。臺郡太守王珍攝縣篆。委政次子。頗踰閑。徵收糧稅苛刻。以風聞捕治盟畝者數十人。違禁入內山伐竹木者百餘人。奸匪遂藉爲口實。日誣謗官府短長。搖惑人心。有黃殿者。居羅漢門。與朱一貴善。時謀不逞。往來密洽。三月。李勇吳外鄭定瑞等相率之羅漢門。見一貴曰。今地方官長。但知沉湎樗蒲耳。種種不堪。兵民瓦解。欲舉大事。此其時乎。一貴曰。然。我姓朱。若以明朝後裔聳

鄉村歸者必衆。皆曰可。夏四月十有九日。己酉。李勇
吳外鄭定瑞王玉金陳印等五十二人。卽黃殿庄中
奉一貴焚表結盟。各招黨羽得數百人。立賊幟書大
元帥朱。夜出岡山襲劫塘汛。辛亥。警報至郡。總兵官
歐陽凱集將弁議出兵。中營游擊劉得紫請行。弗許。
右營游擊周應龍者。龐然魁偉。素議論風生。令以兵
四百人殺賊。又白道府遣臺灣縣丞馮迪調新港目
加留灣肅壠麻豆四社土番隨之前往。岡山距府治
三十里。賊勢未盛。疾趨可滅。是日細雨霑泥。應龍率

兵番行五里駐半路店翼日再進十五里屯角帶圍賊夜出糠榔林汛防把總張文學迎戰敗績棄鳥鎗簾牌軍械爲賊所得應龍隔一溪不能救賊復掠大湖殺汛兵飽所欲而去南路賊首杜君英于是日遣楊來顏子京率其衆百人之貴所稱君英在淡水檳榔林招集粵東種地傭工客民與陳福壽劉國基議共掠臺灣府庫又有郭國正翁義起草潭戴穆江國論起下埤頭林曹林騫林璉起新園王忠起小琉球皆願從君英攻府約朱一貴共事癸丑朱一貴移

屯岡山之麓。周應龍兵至小岡山。遇賊與戰。干總陳元把總吳益等奮力掩擊。賊大敗。退走入山。奪袁交友庄屯住。應龍收兵。劄二濫。楊來顏子京亦回下淡水。甲寅。周應龍在二濫傳令。兵番殺賊一名。賞銀三兩。殺賊目一名。賞五兩。土番性貪淫。殺良民四人。縱火燔民居。復斃八人。聞者股栗。乙卯。遠近賊黨。僭兵番殺掠爲辭。鼓煽沿途庄店。迫脅居民。分授以幟。由是各鄉紛紛響應。監賊旗幟。應龍進劄楠仔坑。得南路營叅將苗景龍警報。稱林曹諸賊夜攻新園。奪軍

器下淡水營汛已陷丙辰周應龍復行十五里宿南路營丁巳官軍遇賊於赤山杜君英朱一貴兩路夾攻戰方亟周應龍以後隊遽退千總陳元戰死把總周應遂被擒吳益重創佯死陳元屍側李碩負傷走周應龍迯歸府治一貴率羣賊大隊隨之君英偕陳福壽劉國基戴穆翁飛虎江國論郭國正楊來顏子京林曹林騫林璉鄭文苑王忠等攻鳳山縣南路營把總林富戰死守備馬定國戰敗自刎死叅將苗景龍逃匿萬丹港漁寮三日爲穆周林泗所擒獻郭國

正國正令林泗翁義殺之以其頭獻朱一貴郡中聞
赤山之敗譁然大震文武各遣家屬宵遁先後駕舟
並出鹿耳門士民相率逃竄戊午總兵官歐陽凱遊
擊劉得紫率兵千餘人臺協水師副將許雲章兵五
百人出劄春牛埔列營以待軍中夜驚鎮兵四散乙
未黎明稍集人無戰心臺廈道梁文煊知府王珍同
知王禮臺灣知縣吳觀域諸羅知縣朱蘂等捐銀一
千五百兩躬慰諸營勞軍庚申賊至鎮協將弁鎗炮
齊發許雲躍馬當先陷陣水師弁兵決命奮勇陸師

繼進賊大敗退屯竿津林把總陳宋見周應遂被縛
牛車力追殺賊救周應遂回營而鎮標把總許陸王
陞見賊勢浩大終當復來徑引去是時水師左營遊
擊游崇功巡霄笨港聞報以兵還入鹿耳門遇文武
眷舟嘆曰官者兵民之望官眷逃則人心散大事去
矣登岸赴敵其壻叩馬請區處眷屬崇功厲聲曰今
日遑知有家哉麾衆馳春牛埔五月朔日辛酉賊衆
數萬俱集劉得紫率守備張成以兵堵截中路口在
半路店迎敵歐陽凱許雲游崇功率弁兵在春牛埔

迎敵。杜君英朱一貴合兵衝殺鎮兵。忽內亂。百總楊泰綽號達家勇者。先通賊爲內應。刺歐陽凱墜馬。羣賊交刃截其首而去。守備胡忠義千總蔣子龍馬總林彥皆死之。汀州鎮標把總石琳帶兵之臺換班。亦戰死。海壇把總李信創重已死。有王宋者憐而欲埋之。復蘇乃與皆匿他所。劉得紫聞敗。率兵還救。所乘馬爲賊砍倒。與守備張成俱被擒。副將許雲衝突血戰。殺賊數百人。與遊擊游崇功千總林文煌趙奇奉把總李茂吉奮臂大呼。所向披靡。自黎明戰至日中。

矢窮砲盡。雲重創遍體。墜馬走行。猶手刃數十賊。勢孤無援。左手被賊砍斷。乃罵曰。生不能殺盡逆奴。死必來殲滅汝等。賊怒。剖雲屍。游崇功單騎殺賊數十人。馬蹶被殺。林文煌。趙奇。奉俱戰死。李茂吉爲賊所執。至南較場。見戴穆挺立岸然。穆怪其不跪。叱之曰。若兵耶。茂吉曰。官。穆曰。把總微官耳。若壯士降。當以汝爲將軍。茂吉瞋目厲聲罵曰。我朝廷命官。豈從汝作賊。舉足踢賊。案案翻奮力。斷縛直前。欲奪刀殺賊。賊衆舉刀共斫之。頭腦破裂。尚指賊痛罵如初。氣

絕乃已。官兵既敗，臺協水師中營遊擊張彥賢、右營遊擊王鼎守備萬奏平凌進楊進千把總朱明、劉清、鄭耀等率兵十餘人戰船四十餘號，聯舫揚航逃出澎湖鎮，標左營遊擊孫文元奔至鹿耳門赴海死。右營遊擊周應龍中營把總王丑附商船逃歸內地，直走泉州。把總李碩、陳福尹成道標守備王國祥、千總許自重皆逃澎湖。臺廈道梁文煊知府王珍同知王禮、臺灣知縣吳觀城、縣丞馮迪典、史王定國、諸羅知縣朱夔、典史張青遠皆一時相率登舟，慮港內商漁

艇艦爲賊所有。盡驅出鹿耳門。齊赴澎湖。先是粵民
高永壽在笨港負販爲生。有病者于破廟餓且死。永
壽活之。一日至南路。遇前所活人。歛歛感泣。引之深
山中。設酒穀相待。賊也。與見朱一貴。刀鎗森列。言倡
亂謀甚悉。邀永壽入夥。佯許之。乘間逃回。赴南路營
告變。弗信。至府復告之。鎮道鎮道以爲狂疾。會審嚴
刑。坐妖言惑衆將論死。從寬責逐過海。遞回原籍。賊平

後制府移檄粵東喚高永壽至臺尋向日所見賊營
故處不可得。令往羅漢門看之。亦不是。再至南路。卽
矯遍尋上下山谷月餘。乃還。據高永壽昔日如夢如
醉想是命當受刑。今遍覓諸山並無其處。亦異事也。

又安平兵竊賣火藥。載往接濟。事發。亦置弗問。又一僧異眼怪飾。周遊街巷。詭稱天帝。使告臺民。四月杪。有大難。難至。惟門設香案。以黃紙爲小旗。書帝令二字。插案中。可免。及賊至。家如僧言。故官兵見者。以爲百姓從賊。多慌亂。以及于敗。群賊攻破臺灣府。蓋朔日午刻也。杜君英先入。住總兵官署。朱一貴繼入。居臺廈道署。同開府庫。分掠金銀。復開紅毛樓。樓故紅彝所築。舊名赤嵌城。紅毛酋長居焉。鄭氏以貯火藥軍器。四十年來。莫有啓者。賊疑爲金銀窖。故發之。得

大小砲位刀鎗硝磺銑鐵鉛彈如山。癸亥立朱一貴
爲僞王。通天冠黃袍玉帶。皆取之優羣。賊擁坐堂上。
呼萬歲。僞號永和。北路奸民賴池張岳鄭惟晃賴元
改萬和尚林泰蕭春等。亦于是月朔日。豎旗聚衆。越
三日環攻諸羅縣北路營。叅將羅萬倉千總陳徽把
總鄭高葉旺分門迎敵。萬倉當其南。出死力拒戰。兵
單無援。賊陳碧以竹篙鎗戳其喉。顛張岳賴元改揮
刀殺之。萬倉側室蔣氏聞兵敗自縊死。陳徽鄭高遜
入山。集鄉民自保。乙丑賴池張岳鄭惟晃賴元改將

羅叅將首。賁至府獻朱一貴請功。一貴見全臺俱陷。揚揚得意。以爲莫已誅也。遂倣俳優登高臺。鳴鐘伐鼓。呵唱拜跪。大封羣賊。以王玉金爲僞國師。王君彩洪陣爲僞太師。杜君英陳福壽李勇吳外翁飛虎陳印戴穆鄭定瑞郭國正顏子京楊來黃殿劉國基黃日昇江國論王忠林曹薛菊林騫林璉陳正達張看賴池賴元改鄭惟晃鄭文苑陳成等爲僞國公。張岳不受公爵。爲僞將軍。陳燥蘇天威等爲僞侯。張阿山卓敬陳國進等爲僞都督。蕭斌詹遴爲僞尚書。內閣

辨書麻恩林玉爲僞輔駕大將軍其餘僞文職部科
以下僞武職總官副將以下不計其數以鄭定瑞蘇
天威同領賊兵三千鎮守鹿耳門是時僞職填街摩
肩觸額優伶服飾搜括靡遺或戴幘頭衣小袖紗帽
金冠被甲騎牛或以色綾裹其首方巾朝服炫煌于
道民間爲之謠曰頭戴明朝帽身穿清朝衣五月稱
永和六月還康熙葢童孺婦女皆知其旦暮可滅而
擒也先是遊擊劉得紫被擒引頸受刃賊素重其名
弗忍殺得紫曰吾爲

天子命官不可不死。但求埋吾帥屍首死瞑目耳。賊黃日昇嘉其義。聽之收埋畢。復禁之學宮。朱子祠求死不可得。賊與言弗應。進食弗食。七日仍不死。士民兵僧進粥苦勸。皆弗食。至是諸生林臯劉化鯉爲言。諸賊可滅狀。當報仇。得紫始受民餽食。啜粥延命。以待大帥作恢復計矣。臺中逃竄各官及避難民人于壬戌癸亥兩日。咸到澎湖。澎湖協將弁倉皇不知所措。見羣情洶洶。而臺中文武俱至也。亦各出家屬登舟。將渡廈門。百姓婦女爭舟雜沓。聲震海岸。右營守備林亮

聞知。請協營主將掣回登舟。各家屬守澎湖。諸將猶豫不決。亮厲聲曰。朝廷以海外封疆付我等。正爲緩急倚賴。非徒昇平食祿。廩營身家已也。今鋒刃未血。而相率委去。他日駢首市曹。其能免乎。丈夫不死則已。死則死忠義耳。請整兵配船守禦要害。俟賊至決一死戰。戰不捷而亮死。公等歸亦未遲。皆曰諾。願死守。亮馳出江干。徑申主將號令。拔所佩刀驅官民家屬各登岸。衆心始固。是時水師提督施世標見避難民船到廈。方知臺變。然未意全郡遽陷也。賊入府。

時文武倉皇潰亂至澎湖喘息稍定乃具文申報丙寅報至廈門世標集諸將議曰臺寇猖獗極矣六七日間全郡俱陷此殆非小敵也今數百艘逃入內地脫有奸徒混跡乘虛鼓煽廈島一搖罪可言哉其各謹巡防嚴守禦無敢懈怠浙閩總督覺羅滿保聞臺陷念廈門爲控制臺灣咽喉閩南沿海根本重地不可不親行彈壓以定人心爲進取恢復之計會商巡撫呂猶龍綏輯省城糧餉軍需諸務屬焉密疏告變且言星馳赴廈狀請

皇上稍寬督責。尅限一月。務必掃除兇醜。復還土疆。復念
廈門地徧人衆。軍興旁午。米價易騰。先移檄浙江廣
東兩省運米之廈。令布政使抄木哈督買。延建上游
之米。運載赴廈平糶。飛咨促提督施世標刻期出師。
檄召南澳總兵官藍廷珍星赴廈門。面商征臺機務。
以糧驛道韓奕總理廈門軍前糧餉。調撥軍需。僱募
船隻諸事。偕督標左營叅將王萬化。撫標左營遊擊
邊士偉。先兼程赴廈。宣諭百姓。使無恐量。調閩省水
陸各標營將備弁兵。悉由水道赴廈。聽候調遣。庚午

總督覺羅滿保發三山王申抵泉之塗嶺。連接南澳鎮稟函大喜曰。藍總兵所見事事與吾脗合。吾調此君平臺得人矣。蓋廷珍聞臺警。條陳出兵事宜。首請總督駐廈。就近督師。而滿保已兼程疾趨三日。澳稟適至。又嘉其指畫謨謀。皆洞中窺會。知爲帥必能成功。故云爾也。時陰雨連旬。乘竹塹子。從數騎行泥淖中。所過人莫知爲制府者。乙亥至廈門。則提督施世標已登舟出港兩日矣。初廈島居民聞臺變倉猝疑賊且長驅澎廈而漳泉山僻無賴。囂囂偶語。四處有

揭竿嘯聚之謀。居郡邑者。攜眷屬。遯深山。居鄉村者。入郡邑。岌岌乎動矣。又聞各路徵兵。恐所至騷擾。米價騰貴。市里驚惶。及總督至厦。從容鎮靜。民乃晏然。召募丁壯。籍游手。皆隸軍中。伏莽萌芽。潛消淨盡。所徵各鎮。協標營兵。多從海船赴厦。陸行至者。亦處之舟中。人給銀米蔬菜。有加。嚴令肅伍。船只許一人登岸。買辦所需。悉依民價。故雖大師雲集。而街巷寂然。不見兵革。未幾。所檄移諸路。運載米石數萬。俱至。米價頓平。民益歡慶。忘亂。屈指臺郡可復也。臺中羣賊。

互爭雄長。當內地。總督過塗嶺之日。正朱一貴杜君英海外吞併之時。先是君英八府時。欲立其子杜會三爲王。衆不服。立朱一貴。君英故恚甚。每事驕蹇。掠婦女七人。閉營中。而一貴出禁淫掠。戴穆強娶民間婦女。一貴殺之。以洪陣私鬻僞劄。併殺洪陣。君英所掠女有係吳外戚屬者。外請釋之。不聽。怒欲相攻。一貴遣楊來林璉往問。君英收縛來璉。一貴怒。密謀李勇郭國正等。整兵圍攻杜君英。敗之。君英與林沙堂筭率粵賊數萬人。北走虎尾溪。至貓兒干屯劄。剽掠

村社半線上下多被蹂躪所未至者惟南崁以北爾淡水營守備陳策聞臺郡陷沒恐賊人將至督弁兵堅守招集鄉壯分佈要害有奸民苑景文潛踪入境欲煽惑番民爲叛策擒而斬之遣隊目鄭明蔡武赴廈請救則總督滿保已先于塗次移咨巡撫呂猶龍就省撥兵賃船從閩安直向淡水及至廈復以十艘配兵五百名令金門守備李燕北路營守備劉錫帶領救淡鄭明蔡武所坐船遭風飄入澎湖施世驃復遣澎湖右營遊擊張駸領兵前往及鄭明等至廈則

呂猶龍自省調發援淡之兵船亦至厦。滿保遣千總李都賁令箭帶領并會諸路官兵星赴淡水應援。統計前後發往救淡之兵共一千七百餘名。二十有七日丁亥南澳總兵官藍廷珍單騎到厦所部舟師繼至。總督滿保大喜與定平臺方略委令總統征臺水陸大軍帶領將弁八十餘員自兵丁壯八千餘名營哨商艘杉板頭艍仔等船四百餘號舵工水手四千餘名會提督施世驃于澎湖刻期進剿祭江誓師滿保躬造海濱送之廷珍意氣慷慨從容謂滿保曰草

寇不足煩。區處其一。登彼岸。大人可。卽奏報。蕩平也。
六月朔日辛卯。樓船出廈門港。翼日至青水溝。颶風
驟起。浪高于桅。未幾覆溺者數次。三軍相顧動色。藍
廷珍親操舟。御風飄至銅山。戊戌風定。發銅山。庚子
到澎湖。會提督施世驃分定調遣。計先後赴澎從征
將弁。督標右營叅將王萬化。陸路提標中營叅將林
政。後營遊擊苑國斗。將軍標右營遊擊魏天錫。撫標
左營遊擊邊士偉。水師提標右營遊擊王良駿。前營
遊擊林秀。後營遊擊許華。金門鎮標右營遊擊。薄有

成銅山營遊擊鄭耀祖海壇鎮標左營遊擊謝希賢
聞安鎮標左營遊擊朱文福寧鎮標右營遊擊郭祺
汀州鎮標左營遊擊王紹緒漳州鎮標左營遊擊齊
元輔雲霄營遊擊金作礪興化協標右營遊擊胡璟
原任海壇鎮左營遊擊李祖原任黃巖鎮中營遊擊
陳允陞澎湖協右營守備林亮海壇鎮右營守備魏
大猷南澳鎮右營守備呂瑞麟聞安協右營守備洪
平陸路提標右營守備康陵水師提標左營守備高
得志泉州城守營守備鄭文祥興化協左營守備劉

永貴同安營守備葉應龍烽火營守備蔡勇漳浦營
守備蘇明良安平協千總董方及各標營千總胡廣
等把總蘇榮等俸滿千總林君鄉等共叅遊都守千
把一百二十餘員目兵丁壯一萬二千餘名大小船
六百餘號舵工水手六千餘名軍火器械米鹽蔬菜
一切軍需皆總督滿保自廈整備靡有欠缺所用商
船俱發價僱募嚮義不受直者量給外委守備千把
總銜劄以鼓勵之復慮大兵進勦澎湖單虛檄召金
門鎮總兵官黃英統領海壇鎮標右營遊擊李殿臣

羅源營遊擊王良翰。福州城守營都司李經世。將軍標左營守備黃元溥。水師提標後營守備何重申。桐山營守備閻威。長福營守備王晏。協同副將羅光乾。左營遊擊陳國星。守備邱延祚等。督官兵防守澎湖。其餘繼至者。皆令施世驃藍廷珍軍前從征。先是周應龍逃回泉州。爲陸路提督穆廷斌獲送總督軍前。而施世驃至澎湖。亦將臺變逃回。將弁張彥賢等十餘員。押解之厦。總督滿保將按軍法。數人者皆請死于敵。冒矢石立功贖罪。許之。令千總游全興管押征

臺至。是亦到澎聽調遣。則周應龍張彥賢王鼎王國祥萬奏平凌進楊進朱明劉清鄭耀陳福尹成李碩陳奇通等合之牛龍許自重爲臺變。逃回十六員是也。而澎協右營把總吳良在臺灣修理戰艦。臺陷從賊爲賊謀取澎湖。領僞劄百張白金五百兩。偕其黨十二人至澎。施世驃故納之。夜使人醉其同行者。酒逆謀破露。搜得僞劄窮治之。遂盡吐賊中情形。知賊黨相攻。百姓不附。藍廷珍言于世驃曰。羣盜皆穿窬烏合。畏死脅從。乖離渙散。一攻卽靡。但其衆至三十

萬不可勝誅。且多殺生靈無益。以某愚見止殲巨魁。數人餘反側。概令自新。勿有所問。則人人有生之樂。無死之心。可不血刃乎也。世驃曰。善。戒將弁登岸之日。無得妄殺賊來降者。悉縱還家。門戶旗幟書大。清良民者。卽爲良民。惟拒敵者乃斬之。癸卯發澎湖。以林亮董方爲前鋒。令外委洪就洪選等善水者十二人。駕小舟同前鋒先行。于鹿耳門深港插標記明。舟行路徑。丙午黎明。舟師咸抵鹿耳門外。賊目蘇天威率衆據鹿耳門砲臺。疊發大砲。又以小舟扼險迎敵。

前鋒林亮董方。以六船冒死直進。亦施大砲攻擊。遙望砲臺。火藥堆積。纍纍。亮令砲專攻火藥桶。中火。藥起。燔死賊無算。賊潰。遂入鹿耳門。維時海靈助順。潮水漲高八尺。藍廷珍率王萬化林政等四百餘艘。連檣並進。林亮董方乘勝掩殺。燬賊船。把總蘇榮爭先亦同登岸。奪取鹿耳門砲臺。烽其營壘。遊擊林秀薄有成。守備魏大猷。葉應龍。追殺逸賊。蘇天威逃入安平鎮城。與賊目鄭定瑞。列兵迎敵。林亮董方奮勇先登。復陷賊陣。藍廷珍率衆將王萬化林政。遊擊魏天

錫邊士偉朱文謝希賢鄭耀祖胡璟郭祺王紹緒齊
元輔金作礪范國斗李祖陳允陞守備呂瑞麟洪平
鄭文祥劉永貴康陵蘇明良等各弁兵繼之賊敗走
林亮董方復登安平鎮城監立大軍旗幟廷珍出示
安民益日猶禾晡也安平旣得令鄭耀祖王紹緒專
守安平城許華守鹿耳門王萬化林政林秀邊士偉
康陵蘇明良李祖駐劄鯤身頭列守要害安平百姓
喜

王師至止老幼趨蹌爭給軍食少壯者自充鄉兵願導官

軍殺賊。是夕。施世驃船到鹿耳門。丁未。乘潮入安平。朱一貴遣楊來顏子京。張阿山翁飛虎率賊衆八千餘人犯安平。林政王萬化邊士偉林秀王紹緒鄭耀祖李祖等各率兵迎敵。千總游全興以張彥賢等十四員同在四鯤身與戰。藍廷珍指揮攻擊。我兵鎗砲連環如雨。復遣朱文魏天錫謝希賢胡璟林亮魏大猷呂瑞麟葉應龍劉永貴等駕小船沿岸夾擊。賊大敗。追至七鯤身瀨口。戊申。魏天錫謝希賢魏大猷率把總牛龍外委守備陳章等以輕舟載鎗砲硝磺烈

焰於塗塹埕水仔尾等處燒賊巨艦凡四。己酉朱一
貴復遣李勇吳外張阿山翁飛虎陳印楊來郭國正
等率賊衆數萬人駕牛車列首爲陣復犯安平。乃以
齊元輔金作礪呂瑞麟蘇明良范崇勛率弁兵爲左
拒王萬化林政邊士偉李祖康陵率弁兵爲右拒鄭
耀祖王紹緒爲後應賊目翁飛虎率所部烏龍旂爲
前鋒驅車擁盾冒炮火衝突羣賊大隊並至左右兩
軍邊士偉呂瑞麟等大戰于二鯤身藍廷珍親督大
砲連環齊發倒賊烏龍旂破牛車陣林秀玉王良駿

朱文謝希賢胡璟林亮魏大猷蔡勇劉永貴各乘小舟。駕大砲附岸夾攻。賊衆大敗。入水死者千餘人。斬獲殺傷不計。自是賊人退保府治。不敢再至。鯤身惟沿岸列砲。晝夜固守。我軍分駕小舟。迫岸攻擊。與賊相持。有西港仔士民具羊酒到安平鎮叩迎。

王師

載家屬爲質。願引大兵從西港仔登岸殺賊。提督施世驃然之。庚戌夜。密遣林亮魏大猷洪平董方以兵一千二百名往西港仔。次日藍廷珍知其事。急言示世驃曰。謀算必出萬全。不可怙勝輕舉。聞賊多在蕭

壠麻豆間。西港仔乃其肘下。且距府不遠。呼召立應。又多竹林。可埋伏。彼若以數千人分佈要害。四面掩擊。亮等一軍危矣。世驃瞿然曰。如何。廷珍曰。當用全力。以大軍繼之。世驃曰。誰當行者。廷珍曰。此非他人所能任。某不敢辭。公當分遣將備於瀨口塗壑埕處。盡力擊賊。聞我師北來。必棄營遁。府治恢復在此。一二日間耳。辛亥初昏。藍廷珍留所部官兵三分之一。會攻府治。率水師五千五百餘人。夜向西港仔進發。翼日黎明。在竿寮鄉登岸。令諸舟悉回安平。諸將曰。

登岸棄舟何也。示軍士必死無還心。今日戰勝。明當直抵府治耳。言未已。諜者報賊在蘇厝甲。與林亮魏大猷決勝。勢甚張。廷珍分兵八隊。以魏天錫金作礪。葉應龍武舉倪鴻範等率兵千人。副林亮魏大猷洪平董方爲前鋒。林政李祖兵千人爲左翼。王萬化邊士偉兵千人爲右翼。復以胡璟劉永貴范國斗范崇勛分千人爲左右奇兵。蘇明良兵四百爲後應。呂瑞麟兵七百爲遊兵。廷珍親率陳允陞陳章林君鄉周宣藍宏沛何期有等領親丁精壯五百人爲中軍。並

進賊目林曹江國論黃殿林騫林璉等率眾迎前鋒
軍奮力衝殺。左右兩翼奇兵繞賊陣後。首尾夾擊。遊
兵突出竹林。橫衝賊陣。中軍燒闕殺進。鎗砲震天。賊
大敗潰亂奔竄。逃斬俘獲屍橫遍地。薄暮至黎頭。廷
珍私料賊必夜劫營。漏初下。傳令撤帳房。捲旗幟。露
刀伏芒蔗間。賊果至。不見大營。大驚。須臾我軍突出
衝殺。賊大敗奔散。自是膽落。不復有戰心矣。癸丑。廷
珍督大兵南下。復敗賊于木柵仔。進至蔦松溪。直搗
臺郡。朱一貴率羣賊數萬遁去。廷珍收復府治。出示

安民駐劄萬壽亭。水師提督施世驃于先一日傳令水陸官兵并進。遊擊林秀王良駿薄有成齊元輔郭祺王紹緒鄭耀祖守備鄭文祥千總游全興與張彥賢等十四員從七鯤身陸路至瀨口攻府治之南。遊擊朱文謝希賢守備高得志蔡勇等分坐小船于鹽埕塗塹大井頭攻府治西角。賊盡驅精銳拒戰。我軍賈勇爭先。遂奪塗塹燬賊營。至晚屯南較場。癸丑與總鎮藍廷珍俱會府治。萬姓歡呼復見天日。戶戶設香案拜迎。

王師廷珍一一慰撫之遣外委守備陳章飛船至廈赴總督覺羅滿軍前報捷乙卯提督施世驃登岸率大兵屯北較場藍廷珍仍駐萬壽宮據弁兵先後報獲殺害歐陽總兵之達家勇殺害副將之黃龍殺害羅叅將之陳碧各付其子歐陽敏許方度羅世正等自行處死以報父仇凌遲剖肝碎屍揚骨聽從其便臺人快之閏六月朔日庚申陳章飛報捷至廈門總督滿保檄藍廷珍署理臺灣鎮總兵官事會巡撫呂猶龍繕疏以捷聞則施世驃在臺灣軍中已先自題奏

上達矣。初臺灣警報于六月至京師。

皇上惻然不忍加誅。乃爲

諭曰。諭臺兵衆據督臣滿保等所奏。并伊等進摺家人所言。臺灣百姓似有變動。又奏稱滿保于五月初十日領兵起程等。朕思汝等俱係內地之民。非賊寇之比。或因饑寒所迫。或因不肖官員刻剝所致。諭督保令其暫停進兵。汝等若卽就撫。自諒爾罪。若執迷不悟。則大兵圍剿。俱成灰燼矣。臺灣止一海島。本地所產不敷所用。祇賴閩省有錢糧養生。前海賊佔踞六十

餘年。猶且勦服。不遺餘孽。今匪類數人。又何能爲諭。旨到時。將困迫情由訴明。改惡爲正。仍皆朕之赤子。朕知此事非汝等本願。必有不得已苦情。意謂坐以待斃。不如苟且偷生。因而肆行擄掠。其致此之罪。俱皆不肖官員。汝等俱係朕歷年參養良民。朕不忍勦除。故暫停進兵。若總督提督總兵官統領大兵前往圍勦。汝等其能支持。此旨一到。諒必就撫。不得執迷不悟。妄自取死。特諭。又

敕浙江將軍塔師拜以甲二千赴閩協防。巡撫呂猶龍遣

按察使董永芟迎勞于浦城。辦理夫船。永芟素有才名。方嚴不阿。一路問民疾苦。捐俸錢恤災傷。多方撫慰。故兵行而民不擾。浙兵至閩。欲宿借民居。呂猶龍不可。召兩司計議。永芟曰。靖亂以安民爲本。若宿民居。民不堪也。命署福州府馮鹽分發諸佛寺居之。于是浙兵駐閩者數萬。得相安一無所苦。

上諭至閩。則六月二十有五日也。總督滿保檄委興泉道

陶範親賁

諭旨往臺灣安撫百姓。併署理臺廈道事。調汀州知府高

驛知臺灣府。分委建寧通判孫魯。往署臺灣府同知。
併臺灣知縣事。海澄知縣劉光泗。往署鳳山。漳浦知
縣汪紳文。往署諸羅。俱隨大兵安輯流亡。慰撫各庄
社民番。伊時臺郡既平。提督施世驃。總兵官藍廷珍。
分遣大兵。擴清南北二路。以王萬化持政。邊士偉魏。
天錫帶領官兵。勦撫南路逃賊。收復南路營鳳山。擒
賊目顏子京。鄭定瑞等。安撫下淡水。大崑麓各處人
民社番。而南路五百里地方。俱皆平復矣。以林秀薄
有成。范國斗。齊元輔。郭祺。胡璟。李祖。鄭文祥。劉永貴。

董方林君鄉及游全興帶同張彥賢等十四員往北路勦撫逸賊。原任遊擊劉得紫先于壬子夜乘間投大帥施世驃。藍廷珍嘉其抗賊不屈。優待之。得紫募丁壯百五十人。請殺賊報仇雪恥。是行與焉。既午。賊敗于大穆降。斬獲甚多。賊黨降者十之九。朱一貴率數千人走臺灣裡溪。大軍追至茅搭尾鐵線橋。將復鹽水港。朱一貴走下加冬。倖滿千總林君鄉率外委千總李佛等二十人。先大軍二十里前行進殺賊。奪牛車馬匹砲械。與陳尚珍楊秀計議。潛通張岳。欲擒

朱一貴先謀去偽軍師王君彩殺之。而漳浦人王仁和素往來溝尾庄。與庄民楊石友善。知其族楊旭楊雄等爲一方巨擘。可與謀。以言餌之。石許爲仁和密告于藍廷珍。廷珍給仁和外委守備。併楊旭楊石楊雄等守備于總合銜。劄令謀擒朱一貴。後有蘇山黃遵爲李祖賁書與楊旭。亦令計擒一貴。于是楊旭與王仁和楊石楊雄陳尚珍楊秀等密糾溝尾前庄後庄小糠榔新牌佳走後潭等庄鄉壯。以待閏六月五日甲子。一貴率千人至溝尾庄索飯食。楊旭等椎牛

響之。許號召六庄鄉壯相助。一貴往眉潭之食。乙丑夜。其黨散去六百餘人。丙寅。楊雄給一貴復回溝尾庄。暮霖雨。旭備館舍。將一貴等分宿民家。傳集六鄉社壯。佯爲守護。潛以水灌賊砲。夜五鼓大譁。稱官兵至。金鼓火砲齊鳴。諸賊倉皇驚起。不知所措。楊雄、楊旭、楊石、王仁和等遂擒朱一貴、王玉全、翁飛虎、張阿山等四人。散其餘衆。吳外除卽各率黨逸出。旭縛一貴等置牛車。赴八掌溪交遊擊林秀、王仁和馳報藍廷珍。廷珍令解赴施世驃軍前。而自往會訊。一貴尚

自尊大欲與提軍抗禮昂然而立。廷珍至此之跪一貴猶妄稱孤家詞甚不遜。廷珍怒搖其足。于是一貴及其黨皆跪伏罪請死。乃檻送廈門。聽總督覺羅滿保解京正法。又有大排竹人民斬楊來首級獻楊秀秀至府竿示藁街。復據李秀等官兵李必第楊雄等鄉壯報獲吳外除印李勇等九犯解至軍前分遣朱文謝希賢呂瑞麟洪平及自澎湖至之守備閻威以兵收復北路營諸羅縣擒斬賊目萬和尚等。北路營千總陳徽把總鄭高率鄉兵來迎。先是陳徽等于

六月丙辰起民兵。攻復諸羅縣。斬賊目賴元。改頭祭羅叅將。將因。

王師來縣治。復爲翁飛虎江國論所奪。仍入山。至是乃盡招撫賊目曾賢。李德。隨朱文等。安輯各庄社番民。分遣汀州鎮中營遊擊景慧。帶領官兵收復笨港。又遣林亮。魏大猷。洪平。以舟師赴笨港接應。平定沿海上下。而援淡之遊擊張賊。守備李燕。劉錫。千總李郡。淡水營守備陳策等。引兵南下。半線時。朱文等已平諸羅。謝希賢引兵壯上。與張賊等合。而北路千餘里地。

方盡皆平復矣。元兇既擒，餘黨解散。尚有當日倡謀渠魁，僞稱國公如謝公英、陳福壽、劉國基、江國論、薛菊王、忠、陳成、鄧文苑及君英三子杜會三等未獲。總督滿保檄藍廷珍擒撫之。重懸賞格，遣弁目外委分途緝捕。方一貴作亂時，有下淡水客庄民人侯光惠、李直三等建大清義民旗，奉皇帝萬歲牌，聯絡鄉壯拒賊。一貴遣福壽、劉國基、薛菊王、忠、劉育等領賊衆數萬攻其庄。六月十有九日，己酉，侯觀德逆戰于淡水溪，敗之。陣斬劉育，殺賊兵及迫入死者萬計。屍骸

狼藉溪沙間陳福壽窮蹙自刎爲賊徒所救聞

王師已進安平五日乃遁八山劉國基薛菊王忠俱逃之

郎矯存匿至是外委陳章遣牒至郎矯踪跡之國基等三人皆在章因與林尚蘇庚駕赴郎矯招撫諭以國恩寬大邀與俱來三人皆首肯有提督差員某繼至責賊逆拜不加禮王忠聞之曰今如此到郡可知遂逃去章以劉國基薛菊見藍廷珍好言慰藉以恩禮加之七月癸丑江國論鄭元長等復聚餘黨藍旗于阿猴林藍廷珍發兵追勦羣賊已散繫旗林木中

國論元長逃北路。其黨除逸。謀于差員張騰霄。騰霄偕逸往撫之。乃與俱至。廷珍爲之美衣服。聽其出入遨遊。而陰使人爲之備。于是就撫諸賊皆忻然自慰。曰。江國論且然。我曹無恙。至六月捷報至京。朝廷先得施世驃奏大喜。特授賁摺戴進官。把總賜主驃東珠朝帽。蟒袍黃帶。異數有加。又以淡水營守備陳策陞補臺灣鎮總兵官。加左都督。時臺中癘疾盛行。行征將士冒炎威。宿風露。惡氣薰蒸。水土不服。疾病故者多。叅將林政王萬化遊擊許華先後俱歿于軍。八

月十有三日。辛未。怪風暴雨。屋瓦齊飛。風雨中流火。條。竟夜燭海。水驟漲。所泊臺港大小船。擊碎殆盡。或飄而上之平陸。拔大樹。傾墻垣。萬姓哀號。無容身地。施世驃。藍廷珍。各終夜露立。風雨中。軍士蜂擁相攜。特不敢動。稍舉足。則風颺顛仆。或裂膚破面流血。翼日霽。靜郡無完宅。壓溺死者數千人。浮屍蔽江。瓦角充路。署臺廈道陶範。府縣高鐸。孫魯等。躬歷民家。拊循流涕。發倉賑貸。瘞死扶傷。以風災飛報上聞。朝廷發帑金賜恤。殘黎始得更生。諸羅一縣。未被風災。

而餘孽楊君李明等聚黨劫掠藍水港。藍廷珍遣人
緝捕悉擒之。又林君等煽誘奸民。豎旂于六加旬。俱
爲知縣汪紳文所獲。并解至府。會同陶範高鐸孫魯
等質訊。僉議押解內地。廷珍曰。甫平思亂。旣赦復叛。
此曹不可活也。今解入內地。不能不牽累無辜。恐民
間人人自危。且上下審駁。奏報往返。動隔經年。海外
反側地。無樹威不足。彈壓吾于就撫者。加之恩。擒者
棄諸市。庶奸徒悚息。可淨盡根株耳。亟梟示衆。定民
心而固疆圉。有罪某自當之。軍中義得專殺。無預諸

君事也。皆曰諾。九月壬辰。梟楊君林君等爲首四人。竿視。其次餘黨分別杖斃。柳誠責逐過水。復有黃輝卓敬在舊社紅毛寮聚謀爲亂。聲言羅漢門阿猴林有王忠等數千人接應。尅日攻府。藍廷珍發兵擒捕。搜獲僞劄。與陶範高鐸孫魯等會議。輝與敬直承不諱。并斬之。陳章訪緝餘孽。復于南路觀音山招撫。陳福壽以來。廷珍大喜。留福壽軍中。以家人禮待之。服食皆從厚。遠近賊徒聞風思歸。誠者益衆。杜君英久處山中。晝伏夜走。聞福壽就撫。頗心動。藍廷珍檄外。

委守備施恩陳祥以謀者林生八羅漢門說之君英
恐見賣欲得福壽面詢情實卽與俱來廷珍遣福壽
施恩等往福壽尚病載牛車以行君英遂出廷珍待
以恩禮一如福壽飲食居處遨遊兩人不相離也君
英尚留其子杜會三未出越三日知乃父無恙千總
何勉往說之會三就撫蓋九月中旬十數日間陳福
壽杜君英杜會三俱羅而致焉提督施世驃自風災
驚悸疾作以九月望日癸卯卒于軍藍廷珍奉檄署
理提督印務陶範高鐸見君英等諸賊出入自由疑

日久有意外患。言于廷珍曰。此曹皆元兇大憝。

上所

留意。今報獲。旦暮必致京師。朱一貴并鞫。而公寬大。

至此。倘逸去。奈何。廷珍曰。極知此賊失一身家隨之。

但王忠陳成鄭文苑餘孽未盡。不得不然。二人視福。

壽君英等所居處。與廷珍臥榻正隔窓櫺。復謂曰。行。

軍膽太大矣。推誠至處極耶。萬一中夜有變。將何及。

廷珍曰。無傷也。遲浹旬。卽送之厦。陶範高鐸皆曰。難。

矣。公以撫爲名。待之心腹。美衣豐食。恣其宴游。彼安。

肯舍而他之。畏罪憚行。作何措置。留之則局不可了。

有逃脫生變之憂。抑之則將束縛驅迫。駭人耳目。又恐山中遊魂。謂公從前皆僞。廷珍曰。有以處之。十月甲戌。呼杜君英等至幕中。詰之曰。頃接制府來書。欲授若輩備弁。令星速赴厦考驗。天霽風和。卽日登舟可乎。江國論不可。廷珍罵曰。汝貌輕福薄。固知非有官者之相。叱退之。杜君英陳福壽許諾。廷珍大喜。賜金爲贐。遣左右送之行。舁婦人輿至幕中。使乘向海岸登舟。呼江國論鄭元長來國論等度不可違。強諾請行。亦賜贐。舁輿送之去。繼呼杜會三至。亦如之。蓋

廷珍欲遣解諸賊預備三舟委目弁在舟以俟自幕
府至海濱分令親隨丁壯沿途倚密爲防備順則
善遣之行逆則幕內細手足閉輿中如婦人不動聲
色市井皆無有知者君英等與順以行舟中亦善待
之至厦總督滿保奉報奉

旨解陳福壽杜君英會三赴京師與朱一貴對質朱一貴

李勇吳外陳印王玉全翁飛虎張阿三俱凌遲處死
親屬同坐陳福壽杜君英會三以就撫從寬斬于市
其餘在軍前擒撫諸賊先後解到厦門如黃殿黃日

升郭國正劉國基林曹江國論林騫林璉陳正達朱
蘆張看鄭惟晃鄭元長等總督滿保俱發臬司收禁
福州府獄候審擬就地正法十有一日乙丑臺灣鎮
總兵官陳策卒署提督藍廷珍移咨總督滿保檄金
門鎮總兵官黃英之臺署事庚寅南路餘孽復叛爲
首蔣瓜成卽陳成蘇清楊美林阿美等集衆豎旂于
石壁寮隨南路兵追勦癸巳黎明干把總何勉杜雄
等率兵搗賊穴擒蘇清高三二名成等奔潰楊美王
教逃匿下淡水知縣劉光泗擒獲之藍廷珍以羅漢

門諸山。素爲匪類逋逃藪。不大舉搜捕。掃清巖谷。無以淨盡根株。分遣遊擊王良駿。薄有成守。備呂瑞麟。率兵往角宿岡。刈蘭坡嶺。一路搜入羅漢門。守備閻威。由仁武庄土地公崎。阿猴林。一路守備李燕。蔡勇。由卓猴木庄岡社。一路。已亥午刻。咸會羅漢門之中埔庄。別遣把總林立。陳雲奇。鄭榮才。游寬。往大武坑。分路堵截。無使賊竄。庚子。深入搜捕。羅漢內門諸將。備分搜銀錠山。佳白寮。東方木。南馬山等處。大武坑諸弁目。搜礁巴。昨郎包米。大龜佛。大湖等處。窮山密箐。

無不徧歷。焚燬賊巢數十所。凡二十七日。乃收軍回營。據搜山將備。及差員外委蘇思維。陳祥李爲勝。林福。石瑀。藍敦等。先後報獲。薊瓜成。卽陳成。林阿美。林丁莊。謀林。讀林。齊鄭。教陳。璞等。而石璧。寮再叛。諸孽盡行廓清矣。又據報。獲鄭文苑。林沙。掌兇死羣。卽陳國正。慙昆。卽林昆。滙仔。吳卽李吳。洪迎。胡君用等。及臺廈道陶範。獲解蕭彬。麻恩。金麻。猴。卽林玉等。而朱一貴案內。附和倡亂諸賊。悉俘囚。惟王忠。邨寶。宣未獲。遁逃。傀儡內山。臺灣山后。藍廷珍。分遣外委。弁目。

諸路訪緝。復令外委鄭國佐林天成召致山番通事章旺同八傀儡內山遍查各社。諭番衆嗣後不許窩留。復令鄭國佐往耶嬌繞行山后。至卑南覓傳檄獎諭大土官文。給以官帶補服賞勞之。令起崇爻七十餘社壯番。從山後大加搜捕。將所有漢人逸賊盡縛以來。于是王等不敢復入番界。隻身竄伏束手待斃矣。前此臺變遁回道府廳縣各文員。朝旨令督臣提臣會審。發往臺灣正法。併已故知府王珍棺剖梟示衆。武職周應龍等亦令督臣會同提臣嚴審定擬。署

提臣尚未班師。十有二月。總督滿保在厦親審諸文員。將原任臺道梁文煊。同知王禮。知縣吳觀域。朱夔。知府王珍屍柩。委海澄營遊擊安奎。賁令箭押送之臺。十有八日甲戌。決于市。而臺灣縣丞馮迪。典王定國。諸羅縣典史張青遠。俱羈臺灣縣獄候部文秋後處決。廣東提督姚堂奉

旨調任福建水師提督。藍廷珍遣遊擊王良駿賁印赴厦。尅期班師。總督滿保以地方初定。檄廷珍以南澳鎮仍統征兵。暫留在臺彈壓。時建議臺鎮總兵官移設

澎湖臺灣府治設陸地副將。裁去水師兩中營將備
弁兵。撤歸內地另補。民間寢食不安。宵小之徒。訛言
復肆。康熙六十有一年春正月。差員陳祥王仁和。續
獲韓淵林良等。監廷珍。念訛言搖惑。會商陶範高鐸
孫魯。以逆賊蘇清等在獄多人。久留未決。恐不足震
懾奸頑。二月二十有九日。甲申。將蘇清林阿美王教
林讀林丁莊謀林昆韓淵林良諸賊。梟斬示衆。李吳
杖死。楊美先一日病死。陳成鄭文苑等。劇賊十數人。
及續獲之邱寶宣江邦俊。悉解內地。與王殿等俱禁。

省獄候審擬歸案正法。

朝廷以臺疆僻處天外。民間疾苦無由上達。

特命滿漢御史各一員。歲奉差到臺巡視。以南澳鎮總兵官藍廷珍調鎮澎湖。總督滿保疏薦督標中軍副將徐左柱調補臺灣陸路副將。三月望日。庚子。南路下淡水奸民林亨等復謀作亂。以合心王三字爲勘合。頒于其黨。方貿帛製旗。欲夜舉事。有密報者。守備陳一得率官兵捕之。擒林亨。搜得勘合及偽劄。供稱同謀爲首。顏煙李咸陳法王帥王祿等。分遣弁兵圍搜。

大崑麓畧寮。及北路鐵線橋諸處。并獲之。復有餘孽。百餘人遁入諸羅后山小石門。得寶等處。夜出行劫。藍廷珍密檄北路叅將朱文協防遊擊林秀發兵搜捕。遣署守備李郡把總鄭高林時葉分三路并進。復遣把總莊子俊蘇思維率兵往大武壠堵截。絕其竄路。夏四月。戊午。諸軍齊集會剿。賊已先一夜遁至三林港。焚汛殺傷兵丁。奪商販小舡二。入海逃生。藍廷珍飛遣水師將弁出洋追捕。聞報在內地青水壠劫坐商舡至銅山洋面。又奪坐小魚舡。料爲潮賊。將散。

夥登岸。必于樟林東隴鴻溝澄海等處。在三林多有帶傷。又從朱一貴作亂時。割截髮辮。易于稽察。星夜飛請總督滿保。巡撫呂猶龍。移檄粵東。令潮州鎮道府縣密行查緝。仍差千總一員。赴潮催提。盡獲劉國華。邱阿路。張舞。賴日輝。林阿元。胡阿發。黃阿赤。黃阿五。巫阿盛。陳阿日等賊黨五十七名。皆解閩審訊。監候正法。癸亥夜。又有奸匪百餘人。在八掌溪小溪洲拜旂作孽。行至竹仔腳塘。殺塘兵陳南王。巨蘇。天貴等三名。比曉皆散。回家爲民。廷珍飛調將弁。上下堵

截搜捕踪跡寂然。差員四路密訪。仍飭營縣廣差偵探。知縣汪紳文。緝獲葉枕廖猛賴勤等。供指同謀聚衆羣賊。因遣兵搜捕北埔寮諸山。千總李郡生擒渠魁李慶。奪賊旂械。及所劫贓物。焚燬窩廬。又據叅將朱文。知縣汪紳文。守備劉錫。千總何勉。陳章。把總陳雲奇。及外委弁目人等。先後緝獲黃潛蘇齊張成李延卿張烏鴨潮邊王妙何歲張鎮朱崑生等劇賊四十餘人。俱解內地。收禁福州府獄。候審擬分別正法。五月。署臺灣府同知兼攝臺灣知縣事孫魯。調補諸

羅縣知縣。

欽差巡臺御史吳達禮黃叔璥至自京師。六月新授臺廈道陳大輦。臺灣府同知楊毓健。員外郎知臺灣縣事周鍾瑄。及副將徐左柱等。俱先後抵臺視事。有奸民鄭仕者。綽號急燒疎。復訛言惑衆。招集亡命。謀于六月乙卯夜。監旗。不果。藍廷珍捕治之。得其黨蕭興祖。李柯等數人。甲戌。并擒會訊。搜獲鄭樹家檔冊。開列僞爵人數。一時旁觀多有駭愕狀。知縣周鍾瑄密白旂道。當堂燒燬。將鄭仕等處死。人心大定。藍廷珍以

副將既至欲遵

旨赴澎湖駐劄。百姓囂囂罷市環

欽差御史道府廳縣各衙門。籲呈請留時

新旨已下。允提臣姚堂所奏。副將仍設澎湖。總兵官仍駐

臺灣。水陸兩中營。悉還舊制。道標守備弁兵。裁歸臺

灣鎮管轄。設南北二路。適中要害之處。百姓欣欣以

手加額。歡聲載道。新調鳳山知縣靳樹畹抵任。署縣

劉光泗仍歸海澄。漳浦知縣汪紳文安撫緝捕事竣。

仍歸漳浦。靳樹畹抵任。署縣染疫病未幾卒。以同知

楊毓健攝鳳山縣事。雍正元年春正月十有九日己亥。逸盜楊合復謀作亂。驟聞

聖祖仁皇帝升遐。未知

新天子卽位。乘間思逞。散剗招邀匪類。謀犯郡邑。藍廷珍高鐸遣外委千總陳栩等擒獲之。窮治其黨。解散二月

登極。恩詔到臺。萬姓舞蹈懽呼。共慶太平。士農商旅安心樂業。無窩匪接濟之人。一二餘孽棲身靡所。饑餓待斃。夏四月十有五日甲子。千總何勉在南路鳳山

林挺獲王忠劉富生陳郡等藍廷珍遣解內地聽總督滿保題正法朱一貴孽黨盡絕矣臺灣平

藍鼎元曰臺灣治亂之局迴出人情意計之外其地方數千餘其民數百萬其守土之官則文有道有府有縣令大小佐貳雜職若干員武有總兵叅將副將遊擊守備大小弁目若干員其額名七千有奇糧儲器甲舟車足備又當

國家全盛金甌靡缺而朱一貴以餽鴨小夫歛焉倡亂不旬日間全郡陷沒此豈智能所及料歟太平日入

文恬武嬉兵有名而無人民逸居而無教官吏孳孳以爲利藪沉痾痼蒲連宵達曙本實先撥賊未至而衆人已離雖欲無敗不可得已然鹿耳鯤身夙稱天險鄭氏一踞其間遂歷三世

國家圖之數十年費錢糧幾百千萬而後能收之今不動聲色七日恢復巨魁就擒孽從授首即使孫吳復生亦未敢望功成若斯之速也良由

聖祖仁皇帝大德如天神威遠震將卒用命海若効靈是以摧陷廓清不勞而邊疆底定

諭旨遙頒白叟黃童無不感激流涕蓋至仁厚澤淪浹人心者深也諸臣或運籌帷幄出身疆場克敵致果功在社稷欲以鼓勵將來收千秋百歲用人之效則不得以其爲日無幾少之矣亂不久禍不深削平者之績不大此非君子之言也賞罰明則民易使今日之酬勲他年之龜鑑知此說者其知未雨綢繆之道乎臺灣海外險較內地更不可緩而此日之臺灣較十年二十年以前又更不可緩前此臺灣止府治百餘里鳳山諸羅皆毒惡瘴地令其邑者尚不敢至今則

南盡耶嬌北窮淡水雞籠以上千五百里人民趨若
鶩焉前此大山之麓人莫敢近以爲野番嗜殺今則
羣入深山雜耕番地雖殺不甚畏至傀儡內山臺灣
山後塔仔難崇爰卑南覓等社亦有漢人敢至其地
與之貿易生聚日繁漸廓漸遠雖厲禁不能使止也
地大民稠則綢繆不可不密今郡地有水陸兵五千
餘人足供調遣鳳山南路一營以四五百里山海奧
區民番錯雜之所下淡水耶嬌盜賊出沒之地而委
之一營八百九十名之兵固已難矣諸羅地方千餘

里淡水營守備僻處天末自八里盆以下尚八九百里下加冬笨港斗六門半線皆奸宄縱橫之區沿海口岸皆當防汛戍守近山一帶又有野番出沒以八九百里險阻叢雜之邊地而委之北路一營八百九十名之兵聚不足以及遠散不足以樹威此杞人所終夜憂思而不能寐者也臺民好爲盜賊不因饑寒方慶削平又圖復起去歲平臺大定之後尚有布散流言嘯聚巖谷復謀作亂者數次屢經撲滅歲餘始殄而王忠一賊伏匿深山至我

皇上卽位乃克就縛可見地方廣大搜捕弗周雖平臺僅
在七日而拔蠶根抵東擒西勦亦有兩載艱難欲爲
謀善後之策非添兵設官經營措置不可也以愚管
見劃諸羅縣地而兩之于半線以上另設一縣官管
轄六百里雖錢糧無多而合之番餉歲徵銀八九千
兩草萊一闢貢賦日增數年間巍然大邑也半線縣
治守備一營兵五百淡水八里岔設巡檢一員佐半
線縣令之所不及羅漢門素爲賊藪于內門設千把
總一員兵三百下淡水新園設守備一營兵百名耶

矯極南僻遠爲逸盜竄伏之區亦設千總一員兵三百駐劄其地使千餘里幅員聲息相通又擇實心任事之員爲臺民培元氣寇亂風災大兵大疫而後民之憔悴極矣然土沃而出產多但勿加之刻剝二三年可復其故惟化導整齊之均賦役平獄訟設義學興教化獎孝弟力田之彥行保甲民兵之法聽開墾以盡地力建城池以資守禦此亦尋常設施耳而以實心行實政自覺月異而歲不同一年而民氣可靜二年而疆禦可固三年而禮讓具興而生番化爲熟

番熟番化爲人民而全臺不久安長治吾不信也顧
或謂臺灣海永不宜闢地聚民是亦有說但今民人
已數百萬不能盡驅回籍必當因其勢而利導約束
之使歸善良則多多益善從來疆域旣開有日闢無
日蹙氣運使然卽使委而棄之必有從而取之如澎
湖南鎮皆爲海外荒陬明初江夏侯周德興皆嘗遷
其民而虛其地其後皆爲賊巢閩廣罷敝及設兵戍
守迄今皆爲重鎮臺灣古無人知明中葉乃知之而
島夷盜賊後先竊踞至爲邊患比設郡縣遂成樂郊

由此觀之可見有地不可無人經營疆里則爲戶口
貢賦之區廢置空虛則爲盜賊禍亂之階臺灣山高
土肥最利墾闢之所在人所必趨不歸之民則歸之
番歸之賊即使內賊不生野番不作又恐寇自外來
將有日本荷蘭之患不可不早爲綢繆者也閒居無
事燕雀處堂一旦事來噬臍何及前轍未遠可不爲
寒心哉殉難諸臣雖功過不一然大節炳然足以增
光宇宙褒其後而畧其先崇獎義烈用慰忠魂亦因
以爲鑒可也

臺自奸民起釁以及平定安集中間事蹟繁多
千頭萬緒欲以一篇文字網羅而條貫之非有
浩然剛大之氣排山倒海之力剗犀斷蛟之筆
未有不如理亂絲或附贅懸疣顧此失彼者也
茲紀一氣呵成絕大神力敘亂之所由生至纖
至微止在職守恬熙便開出無窮禍變可見凡
有地方責任之君子當兢兢業業無事常如有
事之防不可以未雨綢繆爲迂也岡山初起賊
勢未盛不論中材將弁疾趨便可撲滅偏遣一

靡然無用之周應龍玩寇殃民養成賊亂日行
五里十五里稍勝收兵方戰遽退等情形不但
寫出豚龍見虎醜態萬狀亦見離郡咫尺鎮道
奚罔聞知並不急遣能員將兵往換以致赤山
敗衄賊遂長驅入郡此又用人不慎泄沓成風
之過也金甌雄郡無論陷沒此時當事成何光
景幸有陣亡殉難如許李游羅諸公凜凜生氣
至今猶存令讀者心神飛舞爲謫地維賴以立
天柱賴以尊之句彼抱頭鼠竄縮頸蚓蛭能不

愧死無地乎補入高永壽兵爭軼事追咎從前
鎮道疎忽全不以封疆爲意是以賊起浹旬縣
府繼陷稱孤道寡妄希封拜直書弗削以見纍
纍肉食誰生厲階益傷之也不死不逃能全臣
節如遊擊劉得紫尚猶有惻忍羞惡之心故亦
許之若林亮之獨排衆議保守澎湖則諸將中
第一出色寫得有聲有光鬚眉俱動使斯人早
在臺灣必無棄地奔逃之事而用斯人以敵則
又何敵之不摧是澎湖一守扼住臺灣門戶併

收復臺灣之先鋒亦在其中此文字一大樞軸也滿督赴廈督師深得控制機宜一切調度俱臻絕頂肅兵安民于勘亂功已過半讀者于怒髮衝冠之餘忽觀此景星慶雲出現不覺心中爲之一慰大帥出師軍威雄壯不殺二字使反側子自安尤爲平臺第一機括鹿耳安平鯤西港數大戰寫得如火如荼五花八門變化八妙不啻親提枹鼓目覩垓下昆陽飛戈鳴鏑時也府治旣收罪首就擒平定南北二路如風捲

籜溝尾庄下淡水義民功不可沒而一二附和
倡亂同黨渠魁亦必陸續擒撫方得根株淨盡
中間插出癘疾風災慘苦異常見得臺民喜亂
戾氣薰蒸卽使

國法可寬天道亦不肯宥可爲大戒乃尚有甫平
思亂旣赦復叛之奸民則雖欲不殺豈可得乎
鹽水港六加甸舊社紅毛寮石壁寮下淡水三
林竹仔腳再叛諸孽一一正法臺民亦可以恍
然悔悟不敢復萌非分之想矣通篇大意在做

勵地方文武當刻刻以吏治民生爲念使盜賊
無自而興若稍一玩愒便功名自家性命靡不
隨之且費後人許多區畫此居官者之不可不
慎也愚人作賊不過惡想妄行朱一貴聚黨數
十萬不爲不多陷府殺官劫庫僭號不爲不橫
然屈指幾日梟首碎屍誅及親屬數十萬黨俱
歸何處卽後此再叛如楊君林君等八九案無
一不竿視藁街作賊果何益乎所以儆凡爲民
者皆當起忠孝仁讓之心卽消其犯上作亂之

意官民交勉則海甸昀昀常保寧謐子孫世世
俱享昇平此作平臺紀畧者之意也大書特書
正敘側敘補敘插敘分敘合敘錯綜變化矯如
游龍至其陡然而起絀然而止遙接遙應飛渡
暗渡筆筆有神一篇萬五六千言讀之惟恐其
盡不復有冗長漫衍之嘆知其浸淫于史漢者
深矣總論鑒前車籌未雨措置設施絕大經濟
則又當于長沙中壘間求之有此關世道之文
非腐生所可與議也

雲錦少多病舞象後三年不讀書深自懼其弗
成材也族有過者誚之曰此所謂今人一服儒
衣反奄奄欲絕矣子之病在安坐偃臥未嘗一
勞力是以筋骨懈怠血氣不行今試習拳械練
手足日出汗數升非惟不病且雄壯焉如其言
果稍健因窮弄刀盾飛礮彈轡弓走馬以爲樂
家君固見其弗成材也亦聽之康熙六十年
夏五月聞報臺灣朱一貴作亂先伯父忠毅
公統師征臺念軍中無與謀畫者時幕友陳

少林先生已應制府滿公聘他人畏風濤干戈
莫敢往遂以家君行雲錦從焉襄毅公笑
謂曰養軍中千日用在一朝汝病三載遂成健
兒亦爲一朝用也雲錦時年十有九歲持戟立
樓船乘風破浪覺甚壯迨一鼓入鹿耳門又一
鼓收安平鎮鯤身數戰奮勇爭先目覩巨砲雷
轟鳴鏑從耳邊飛過亦習爲故常不復知紛紛
者何物矣七日之內府治收復如疾風之掃秋
蔞亦似有一番佳趣嘆古人年少請纓大都如

此

聖皇在上仁育義正凡有血氣者莫不尊親豈容小醜不共逃于光天化日之外


天戈所指罪人魄喪何蠕動之敢不伏辜也事定旋歸迴憶執兵徵逐竟成卒伍粗鄙面目何堪使君子觀之始愧勵發憤欲讀書 家君命偕諸弟從師受業數年以來蹉跎作輟至今碌碌無所成少時不勉悔何及矣平臺紀畧乃 家君還鄉時所著者 家君叅贊謀畫公檄文詞具

載東征一集茲編特記小醜起滅蕩滌安平事
蹟而已 家君身在行間指揮跋涉 襄毅公
欲上其功 家君不可蓋當時尚應制舉不欲
以書生廁名勲籍今紀畧亦置身事外弗以姓
名勞績夾敘其間雖自審位置不爭此區區一
日之長亦以示至公無私垂爲信史也是書風
行海內已十餘年雍正十年 家君客廣州焉
執友 天長王先生同事筆硯 先生以板文
漫漶爲加評點再付梓人雲錦趨庭在粵助家

君校讎且識數語于後因薰沐百拜而書之
雍正十年秋八月乙卯朔長男雲錦謹識



雍正十年秋八月乙卯朔長男雲錦謹識







平臺紀略

DS
799
.65
L357
1796